

PM Grameen Bharat

प्रधानमंत्री नरेन्द्र मोदी होर अज्ज नमीं दिल्ली च ग्रामीण भारत महोत्सव 2025 दा उद्घाटन कीता। भारत मंडपम च आयोजित इक विशाल कार्यक्रम गी संबोधत करदे होई आखेआ जे ग्राएं दे विकसित होने कन्नै गै पूरा देश विकसित होई सकदा ऐ। इस महोत्सव दा विषयसार “गांव बढे ते देश बढे रखेआ गेदा ऐ जेह्दा मकसद विकसित भारत 2047 दे लक्ष्य गी हासल करने लेई मजबूत बुनियाद तैआर करना ऐ। इस महोत्सव दा मकसद ग्रामीण ढांचे च बाददा करना, आत्मनिर्भर इकाइयां कायम करना ते ग्रामीण समुदायें अंदर नमिएं काह्डें आहली प्रवृत्ति गी बढ़ावा देना ऐ। 6एं दिनें दे इस महोत्सव दा विशे—सार ऐ ‘विकसित भारत बनाने लेई इक मजबूत ग्रामीण भारत दा निर्माण’। इस कार्यक्रम दा उद्देश्य उद्यम—कारखानादारी दे राहें ग्रामीण महिलाएं गी सशक्त बनाना ऐ। इस दरान पूर्वोत्तर दे राज्यें बक्खी चेचे तौर पर ध्यान दित्ता जा’रदा ऐ।



Dy CM

नीतियां बनाने आहलें ते तकनीकी माहिरें बश्कार तगड़े सरबंधें दे महत्वै पर लोऽ पांदे होई उपमुख्यमंत्री सुरिंदर चौधरी होरें आखेआ ऐ जे सेवाएं दी बेहतरीन ढंग्गै’नै दस्तयाबी ते विकास—बाददे आहली पैहलकदमिएं दी असरदार ढंग्गै सिर अमल—आवरी लेई एह् अत्त लाजमी ऐ। उपमुख्यमंत्री होरें एह् गल्ल कल शालटेंग च मकैनिकल इंजीनियरिंग डिजीजन दे दौरे दरान अधिकारिएं—कर्मचारिएं कन्नै गल्लबात करे करदे हे। इस मौके पर उनें बर्फ हटाने आहले सूबाई नियंत्रण कक्ष दे कम्मकाज दा जायजा बी लैता।



Tpt. Minister

ट्रांसपोर्ट, खुराक, सार्वजनिक बंड बिक्री ते उपभोक्ता मामले सरबन्धी मंत्री सतीश शर्मा होरें कल अपने मतैह्त मैह्कमे दे कम्में काजै दी समीक्षा करने लेई बक्ख—बक्ख बैठकां लाइयां। इस दरान उनें सयाले दरान राशन दी सप्लाई ते होर दुइएं जरूरी चीजें दी दस्तयाबी जकीनी बनाने लेई कीते गेदे प्रबंधें दा जायजा लैता। उनें मैह्कमा ट्रांसपोर्ट दे कम्में दी

समीक्षा कीती ते सरबंधत अफसरें गी आखेआ जे गडिडएं दे रख-रखाव, ट्रांसपोर्ट सेवा टकोहदा करियै दूर दरेड़े इलाकें च ते ढंगै सिर कराया वसूली बारे बी पूरी संजीदगी कन्नै कम्म कीता जा। सिविल सचिवालय श्रीनगर च गै केई शिष्टमंडलें बी मंत्री हुंदे नै मिलियै अपनिएं दिक्कतें, शकैतें ते मंगें गी उंदे अगगे रखेआ। जिनेंगी धरोइयै सुनने परैत मंत्री होरें उंदे तौले ते पैहल दी बिनाह पर नबेड़े दा जकीन दोआया।

<><><><><><>

CS-Surya Ghar

मुख्य सचिव अटल डुल्लु होरें जम्मू-कश्मीर च पीएम सूर्य घर मुफ्त बिजली योजना दे तैहत घरें दिएं छत्तें पर सूरज दी तपश कन्नै चलने आहले सौर उर्जा पैनल लाने दे कम्म च हासल प्रगति दा जायजा लैने आस्तै कल इक बैठक लाई। इस मौके पर मुख्य सचिव होरें सरबंधत मैहकमें पर जोर पाया जे ओह इस योजना बारै मते शा मते लोकें गी जागरूक बनाने ते एहदे लेई मुकामी भाशाएं च प्रचार करने ते ताले गेदे उपभोक्ताएं गी इस सरबंधै च मुकामी भाशाएं च एसएमएस भेजने दी जरूरतै पर बी जोर पाया गेआ। मुख्य सचिव होरें केन्द्र शासित प्रदेश दे सब्बन जिलें च तकरीबन 30 ज्हार सौर उर्जा संयंत्र स्थापित करने दा लक्ष्य हासल करने लेई सरबंधत कारपोरेशनें गी हुकम रसाल कीता। उनें इब्बी आखेआ जे जिच्चर एह लक्ष्य हासल नेई करी लैता जंदा उच्चर इस योजना बारै पूरी सरगर्मी कन्नै लोकें गी जागरूक बनाने दा कम्म तोढ चाढ़ेया जा।

<><><><><><>

World Braille Day

अज्ज विश्व ब्रेल दिवस मनाया जा'रदा ऐ। एह दिन हर ब'रे दिक्खने च लचार ते अददे दुब्बे नाबीना लोकें आस्तै संचार दे साधन दे रूप च ब्रेल लिपि दे महत्व दे बारे च जागरूकता बढाने आस्तै मनाया जंदा ऐ। 2018 च संयुक्त राष्ट्र महासभा ने ब्रेल परंपरा दे पिच्छे दे दूरदर्शी लेई ब्रेल दे जनमध्याड़े दे उपलक्ष्य च 4 जनवरी गी विश्व ब्रेल दिवस दे रूप च घोषत करने दा फैसला कीता हा।

<><><><><><>

Kushtwar Inspection

किश्तवाड़ दे मैहकमा माल दे एसिस्टेंट कमीशनर निभर्य शर्मा, बीडीओ किश्तवाड़ संजीव कोतवाल ते पीएचई ते जीआरएफएफ दे अधिकारिएं कल राष्ट्रीय जरनैली सड़कै पर कुलीद चौक कोला लेइयै सेक्टर 5 तगर सड़कै दी स्थिति दी सांझे तौरा पर निरीक्षण कीता। टीम नै सड़कै पर औने आलिएं दिक्कतें, सरबंधत ढांचे ते पानी दे निकास सरबंधी बवस्थाएं दा जायजा लैता। इस दरान मैहकमा बिजली विकास, ग्रामीण विकास, पीएचई ते ग्रेफ दे अधिकारिएं गी निर्देश दित्ता जे उंदे मैहकमे हेठ पौंदिएं, उजागर कीती गेदिएं सब्बने दिक्कतें गी दूर करने दा निर्देश दित्ता तां जे सड़कै पर गड़िडएं दी आओजाई च कुसै चाल्ली दी कोई दिक्कत परेशानी पेश नेई आवै।

<><><><><><>

Weather

मौसम विभाग नै जम्मू-कश्मीर च 5 ते 6 जनवरी लेई मौसम सरबंधी येलो-अलर्ट आहली चेतावनी जारी करदे होई आखेआ ऐ जे इस दरान बक्ख-बक्ख थाहें पर भारी बरखा ते बर्फबारी होई सकदी ऐ। आकाशवाणी दे जम्मू संवाददाता मूजब, स्थानी मौसम विभाग दी चेतावनी च प्रदेश दे केई हिस्सें च भारी बरखा बरने ते बर्फबारी दे असार दस्से गे न। जंदे रोज जम्मू शैहर ते एहदे कन्नै लगदे केई सारे इलाकें च धुंध ते कोहरा छाए दा रेया जेहदे चलदे एह असार जताए जा करदे न जम्मू च अज्ज जां कल बरखा बरी सकदी ऐ। इस अवधि दरान, उच्चिएं धारें पर बर्फू दे ल्हास-तोदे पौने ते मुख्य सिडकें पर गड़िएं दी आओजाई प्रभावित होने दी शँका बी जताई गई ऐ। तोआई, ऐतिहासिक मुगल रोड जेड़ी पुंछ ते राजौरी जिले गी कश्मीर दे शोपियां जिले कन्नै जोड़दी ऐ ओह गड़िएं दी आओजाई लेई अजें बी बंद ऐ। आकाशवाणी संवाददाता दी रिपोर्ट मूजब मुगल रोड दे केई सारे हिस्सें पर तलैहट होने करी इस शिडकै पर गड़िएं दी आओजाई बंद ऐ।

<><><><><><>